

四部叢刊

卷一百一十五

四部叢刊初編集部

王文成公全書

三

卷十九至卷三十

王文成公全書卷之十九

外集一 賦詩

賦騷七首

太白樓賦

丙辰

歲丙辰之孟冬兮泛扁舟予南征凌濟川之驚濤
兮覽層構乎任城曰太白之故居兮儼高風之猶
在蔡侯導余以從陟兮將放觀乎四海木蕭蕭而
亂下兮江浩浩而無窮鯨敖敖而湧海兮鵬翼翼
而承風月生輝於采石兮日留景於嶽峰蔽長煙

乎天姥兮渺匡廬之雲松慨昔人之安在兮吾將
上下求索而不可蹇予雖非白之儔兮遇季真之
知我羌後人之視今兮又烏知其不果吁嗟太白
公奚為其居此兮余奚為其復來倚穹霄以流盼
兮固千載之一哀昔夏桀之顛覆兮尹退乎莘之
野成湯之立賢兮廼登庸而伐夏謂鼎俎其要說
兮維黨人之擠詬曾聖哲之匡時兮夫焉前枉而
直後當天寶之末代兮淫好色以信讒惡來妹喜
其猖獗兮衆皆狐媚以貪婪判獨毅而不顧兮爰

命夫以僕妾之後寧直死以顧領兮夫焉患得而
局促開元之紹基兮亦遑遑其求理生逢時以就
列兮固雲臺麟閣而容與夫何漂泊于天之涯兮
登斯樓乎延佇信流俗之嫉妬兮自前世而固然
懷夫子之故都兮沛余涕之浹浹廟堂之偃蹇兮
或非情之所好惟不合於斯世兮恣沉酣而遠眺
進吾不遇於武丁兮退吾將顏氏之簞瓢奚麴蘖
其昏迷兮亦夫子之所逃管仲之輔紂兮孔聖與
其改行佐璘而失節兮始以見道之未明覩夜郎

之有作兮橫逸氣以徘徊亦初心之無他兮故雖
悔而弗摧吁嗟其誰無過兮抗直氣之為難輕萬
乘於褐夫兮固孟軻之所嘆曠絕代而相感兮望
天宇之漫漫去夫子其千祀兮世益隘以周容媒
婦妾以馳驚兮又從而為之吮癰賢者化而改度
兮兢規曲以為同卒曰嶧山青兮河流瀉風颼颼
兮澹平野凭高樓兮不見舟楫紛兮樓之下舟之
人兮儼服亦有庶幾夫子之蹤者

九華山賦

壬戌

循長江而南下指青陽以幽討啓鴻濛之神秀發
九華之天巧非效靈於坤軸孰構奇於玄造涉五
溪而徑入宿無相之窈窕訪王生於邃谷搆金沙
之清潦凌風雨乎半霄登望江而遠眺步千仞之
蒼壁俯龍池於深窅吊謫仙之遺跡躋化城之縹
緲欽鉢盂之朝露見蓮花之孤標扣雲門而望天
柱列仙舞於晴昊儼雙椒之闢門真人駕陽雲而
獨躋翠蓋平臨乎石照綺霞掩映乎天姥二神升
於翠微九子鄰於積稻炎燄起於玉甌爛石碑之

文藻回澄秋於枕月建少微之星旒覆甌承滴翠
之餘瀝展旗立雲外之旌纛下安禪而步逍遙覽
雙泉於松杪踰西洪而憇黃石懸百丈之灝灝瀨
流觴而縈紆遺石船於澗道呼白鶴於雲峰釣嘉
魚於龍沼倚透碧之峴岿謝塵寰之紛擾攀齊雲
之嶢峩鑑琉璃之浩演沿東陽而西歷殮九節之
蒲草樵人導余以冥採排碧雲之瑤島群巒翳其
繆藹失陰陽之昏曉垂七布之沉沉靈龜隱而復
恍履高僧而屨招賢開白日之杲杲試明茗於春

陽汲垂雲之淵湫凌繡壁而據石屋何文殊螺髻
之蟠糾梯拱辰而北眄墮遺光於拾寶緇裳迓於
黃袍休圓寂之幽俏鳥呼春於叢篁和雲韶之鷺
鷖喚起促余之晨興落星河於簷棹護山嘎其驚
飛恠遊人之太早攬卉木之如濯被晨暉而爭姣
靜饒聲之剝啄幽人劓參蕨於冥杳碧鷄噉於青
林鵬翻雲而失皓隱搗藥於樛蘿挾提壺餅焦而
翔繞鳳凰承盃冠以相遺飲沆瀣之仙醪羞竹實
以嬉翺集梧枝之嫋嫋嵐欲雨而霏霏鳴濕濕於

豐葆躡三遊而轉青峭拂天香於茫渺席泓潭以
濯纓浮桃瀉而揚縞淙淙而落蔭飲猿猱之捷
佼睨斧柯而昇大還望會仙於雲表憫子京之故
宅歎知微之碧桃倏金光之閃映睫累景於穹圉
弄玄珠於赤水舞千尺之潛蛟並花塘而峻極散
香林之迴飈撫浮屠之突兀泛五釵之翠濤襲珎
芳於絕巘裛金步之搖搖莎羅躑躅芬敷而燦耀
幢玉女之妖嬌蹇龍鬚於靈寶墮鉢囊之飄飄開
仙掌於嶽嶽散青馨之迢迢披白雲而蹠崇壽見

叅錯之僧寮日既夕而山冥掛星辰於窿菽宿南
臺之明月虎夜嘯而熊咆鹿麋群遊於左右若將
侶幽人之岑寥迫高寒其無寐聞冰壑之洞簫溪
女厲晴瀧而曝朮雜精苓之春苗邀予觴以玉液
飯玉粒之瓊瑤溘辭予而遠去颯霞裾之飄飄復
中峰而悵望或仙蹤之可招迺下見陽陵之蜿蜒
忽有感於子明之宿要逝予將遺世而獨立採石
芝於層霄雖長處於窮僻迺永離乎塵囂彼蒼黎
之緝緝固吾生之同胞苟顛連之能濟吾豈靳於

一毛矧狂胡之越獠王師局而奔勞吾寧不欲請
長纓於闕下快平生之鬱陶顧力微而任重懼覆
敗於或遭又出位以圖遠將無謂於鷦鷯嗟有生
之迫隘等滅沒於風泡亦富貴其奚為猶榮薜之
一朝曠百世而興感蔽雄傑於蓬蒿吾誠不能同
草木而腐朽又何避乎群喙之呶呶已矣乎吾其
鞭風霆而騎日月被九霞之翠袍搏鵬翼於北溟
釣三山之巨鰲道崑崙而息駕聽王母之雲璈呼
浮丘於子晉招勾曲之三茅張遨遊於碧落共太

虛而逍遙亂曰蓬壺之貌貌兮列仙之所逃兮九
華之矯矯兮吾將於此巢兮匪塵心之足攬兮念
鞠育之劬勞兮苟初心之可紹兮冰矢弗撓兮

吊屈平賦

丙寅

正德丙寅某以罪謫貴陽取道沅湘感屈
原之事為文而吊之其詞曰

山黯慘兮江夜波風颼颼兮木落森柯沅中流兮
馬泊湛椒醕兮吊湘纍雲冥冥兮月星蔽晦冰峻
嶢兮霰又下纍之宮兮安在悵無見兮愁予高岬

兮歎崎紛糾錯兮樛枝下深淵兮不惻穴瀕洞兮
蛟螭山岑兮無極空谷谿谿兮迥寥寂猿啾啾兮
吟雨熊羆嗥兮虎交蹟念纍之窮兮焉托處四山
無人兮駭狐鼠魑魅遊兮群跳嘯瞰出入兮為纍
姦宄嫉纍正直兮反詆為殃昵比上官兮子蘭為
臧幽叢薄兮疇侶懷故都兮增傷望九疑兮參差
就重華兮陳辭沮積雪兮礪道絕洞庭渺邈兮天
路迷要彭咸兮江潭召申屠兮使驂娥鼓瑟兮馮
夷舞聊遨遊兮湘之浦乘回波兮泊蘭渚瞻故都

兮獨延佇君不還兮郢為墟心壹鬱兮歆誰語郢
為墟兮函崤亦焚讒鬼逋戮兮快不酬寃歷千載
兮耿忠悞君可復兮排帝閭望遁跡兮渭陽箕羅
囚兮其猳以狂艱貞兮晦明懷若人兮將予退歲
宗國淪兮摧腑肝忠憤激兮中道難勉低面兮不
忍溘自沉兮心所安雄之謏兮讒喙衆狂穉兮謂
纍揚已為魑為魅兮為讒媵妾纍視若鼠兮佞類
有泚纍忽舉兮雲中龍新掩霽兮颼風橫四海兮
倏忽駟玉虬兮上衝降望兮大壑山川蕭條兮濟

寥廓逝遠去兮無窮懷故都兮蜷局亂曰日西夕
兮沅湘流楚山嵯峨兮無冬秋累不見兮涕泗世
愈隘兮孰知我憂

思歸軒賦

庚辰

陽明子之官于虔也解之後喬木蔚然退食而望
若處深麓而遊於其鄉之園也構軒其下而名之
曰思歸焉門人相謂曰歸乎夫子之役役於兵革
而沒沒於微纒也而靡寒暑焉而靡昏朝焉而髮
蕭蕭焉而色焦焦焉雖其心之固囂囂也而不免

於呶呶焉嘒嘒焉亦奚為乎稿中竭外而徒以勞
勞焉為乎哉且長谷之迢迢也窮林之寥寥也而
耕焉而樵焉亦焉往而弗宜矣夫退身以全節大
知也斂德以亨道大時也怡神養性以遊於造物
大熙也又夫子之夙期也而今日之歸又奚以思
為乎哉則又相謂曰夫子之思歸也其亦在陳之
懷歟吾黨之小子其狂且簡俚俚然若瞽之無與
偕也非吾夫子之歸孰從而裁之乎則又相謂曰
嗟乎夫子而得其歸也斯土之人為失其歸矣乎